

Desacuerdo grandi entre Minister Otmar Oduber y AHATA

Gobierno kier cambia ley pa regula permisonan di hotel

AHATA, Marriott, Renaissance y Hyatt ta adverti cu lo bringa e bataya den Corte

ORANJESTAD (AAN): E hecho cu Aruba Growth Fund a logra toch pa cumpra e edificio di Carlson Group pa evita cu e propiedad ta bira un otro "all inclusive hotel" no a termina cu e discusion riba e tema specifico ey. Ta muestra cu ta awor e discusion mes a cuminsa y a desemboca den un discusion feroz entre Minister di Turismo Otmar Oduber y directiva di Aruba Hotel and Tourism Association (AHATA). No por descarta cu e discusion lo por caba te den un bataya legal den Corte, manera cu e ta mustrand awo.

Gobierno a laga sa for di algun aña caba, cu ta su intencion pa trece cambio den e maneho pa cu hotelnan "all inclusive" den cual e turista ta paga un suma adelanta cu ta inclui alohamento den camber y gasto di cuminda, bebida y servicio inclui. Na un prome instante Gobierno a laga sa di ta contemplando e idea pa inventarisa e situacion actual y haci cu hotelnan por bende solamente 10% di nan cambenan di acuerdo cu e paquete total aki.

Sin embargo, a sigui varios reunion cu AHATA, den cual nan a expresa nan preocupacion y despues di e dialogo Minister a propone pa aumenta e 10% pa 20%.

Ora AHATA a informa su miembronan di intencion di Minister Otmar Oduber, esaki no a cay den bon tera. Especialmente cerca e hotelnan existente cu no ta precisamente y exclusivamente den e industria di "all inclusive", cu ta sinti cu si Gobierno cambia nan permiso, cu nan ta bay atras den nan derechonan y cu esaki ta mete den "free enterprise" y ta perhudica clima di inversion. Ironia ta cu precisamente e hotelnan "all inclusive" lo ta e uniconan pa beneficia cu un ley asina pasobra nan lo no tin mas competencia y hotelnan time share no ta wordo afecta. Asina mes den AHATA mayoria ta contra



intervencion di Gobierno cu un principio democratico, cu un compania mester por comercialisa su producto dunando mas balor (value added) manera "value meal" di fast food.

A sigui intercambio di cartanan fuerte, cu a conduci na un reunion cayente diabierna atardi, den cual por sinti cu partidonan a bay for di otro den mal forma. Esaki a bay compania cu carta di abogado, cu ta indica Gobierno cu si nan sigui cu intencion di cambia e "hotel vergunning" cu por lo menos dos hotel, esta Marriott Resort y Renaissance Resort lo bay Corte. Den esaki parce cu Hyatt Regency tambe ta

canando e mesun caminda.

E hotelnan ta sostene e maneho di Gobierno y su intencion pa regula benta di paketenan "all inclusive" solamente pa proyectonan nobo caminda cu e inversionista lo sa di antemanodielimitacionaki.

Mientras cu di un banda e hotelnan ta sinti cu Gobierno mester garantiza nan derechonan, di otro banda nan ta lamenta cu e mesun Gobierno awor kier viola nan derecho dor di mete directamente den nan decision con pa maneha nan negoshi miho. Es mas, e hotelnan ta convenci cu si e ley aki dreठा na vigor, cu esey lo reduci resultadonan y e balor di nan propiedad drasticamente

y lo deteriora e clima di inversion riba nos isla.

Gobierno, representa pa Minister Otmar Oduber a subraya su posicion bisando cu e hotelnan mester compronde cu nan unico interes ta nan negoshi, siendo cu Gobierno tin un rol diferente y mester tene cuenta cu tur hende. Den esey Gobierno ta e entidad cu ta determina e reglanan di wega y e hotelnan tin cu atene nan mes na e reglanan ey, mescos den tur pais.

Minister Otmar Oduber a laga AHATA sa cu si e cambio aki lo nifica cu ta bin un bataya legal den Corte, anto e ora asina e lo tin cu bay. E ta determina pa sigui cu su vision pa tin control riba e forma cu hotelnan ta haci negoshi, pa asina por tin garantia di un nivel di calidad cu nos kier ofrece na turistanan, den bes cu Gobierno ta depende di locual e hotelnan ta trece aden como huesped.

Te cu awor, ta Minister di Salubridad Publica otorga "hotel vergunning", basa riba vision di Gobierno. Cu e cambio proponi, Minister di Turismo tambe lo tin cu firma e permiso.

Cu e cambio aki Minister Otmar Oduber kier evita pa den futuro sosode manera a pasa recientemente, ora RIU Resort a cumpra e edificio di Westin Resort y combirti'e den un hotel RIU, pues "All inclusive".

Si no tabata pa intermediacion di Gobierno, nan lo a cumpra Radisson tambe y hisa e cantidad di cambenan "all inclusive" mas ainda. No tur partner den turismo ta na fabor di e tendencia aki, pasobra aunke e forma di haci negoshi ta garantiza un ocupacion mas halto y mas placa na impuesto pa Gobierno, e por tin un impacto menos positivo pa tur otro negoshinan for di e hotelnan aki.

E siman aki reunionnan lo continua entre AHATA y Minister Otmar Oduber riba e tema aki, den cual Gobierno ta boga pa cambia e ley cu ta atende con y ken ta otorga permiso di hotel y bou di cua condicionnan, mientras cu e hotelnan ta menasa di bay Corte si acaso Gobierno purba mishi cu nan derechonan basico estableci prome cu a haci e inversion.